

## యాకోబు రెగిడ్లి ఉత్త్రమ్ బారిక్ జలో యాకోబు రెగిడ్లి ఉత్త్రమ్

1 దేముడుచి, ప్రబు జలో యేసుక్రీస్తుచి సేవ కర్తొ జోచొ \*గొత్తి నుదొ జలో †యాకోబు, వేర వేర దేసిమ్లుతె చెతుర్పు జల ‡బార తెగల్వ యూదుల్క, జోబర సంగ కెర రెగిడ్లి ఉత్త్రమ్.

అల్లర్ సేడ్డిన్చి రిసా దయిరిమ్ కోడు

2 బావుడ్లు, తుమ్ వేర వేర అల్లర్ సేడ పరిచ్చ రితి జలె, 'చెంగిల్' మెన పూర్తి సర్ద తెన్ తా 3 కిచ్చొక మెలె, తుమ్చి నముకుమ్ అల్లర్లు వాట్ పరిచ్చ జలె, జిన్లె, తుమ్చి పెట్టి పూర్తి నిదానుమ్ జస్తె. 4 ప్రబుచి ఆత్మక తుమ్ పూర్తి జతి రితి, తప్పు నే జతి రితి, తుమ్చి ఆత్మతె కిచ్చొ చెంగిల్చి నే పిట్టి రితి, జేవ్చి కామ్ పూర్తి జర్గు కెర్తి రితి తుమ్ నిదానుమ్ కెరన.

5 ఇన అల్లర్ పరిచ్చల్తె కిసి ఇండుక గే తుమ్తె కో జలెకు నేన్లెగిన, దేముడుక పున. కో పుసిలె, నే గోల కెర్తె, దర్ముమ్ తెన్ జో బుద్ది తయెదె. 6 గని ముక్కిమ్క ఎక్కి నముకుమ్ తెన్, కిచ్చొ అన్మానుమ్ నెంతె, పున. కిచ్చొక మెలె, కక్క అన్మానుమ్ తయెదె గే, గట్టిజ వాదు వీర్లె సముద్రుమ్చ కెర్టల్ కిసి ఇత్తల్ ఒత్తల్ లయెదె గే, జో మాన్సు దస్సి జయెదె. 7 నిజుమి, దసా మాన్సుక దొన్ని మెన్సుల్ తయెదె. కిచ్చొ కామ్తె కి జోక ఎక్కి నిదానుమ్ తయె నాయ్. 8 దసా మాన్సు, జలె, కిసి ప్రబుతె నజన్లె కి కిచ్చొ కి దొర్కు జయదె మెన ఉచరుక జయె నాయ్!

\* 1:1 1:1 నెంజలి 'గొతిమాన్సు' నెంజలి 'సేవ కర్తొసా'. † 1:1 1:1 ఈజీ యాకోబు యేసుచొ బాచొన్ జా తిలో, బెర్తె. మరియ చి యోసేపుచి పెట్టిచొ. యెరుసలేమ్చ నంపజలనచి నబక వెల్లో తిలో. బారికుల్ 15:6-29, 21:18, గలతి 1:19, 2:9, 12. ‡ 1:1 1:1 'బార తెగల్' మెలె, ఒగ్గర్ పూర్ణుమ్ తెంతొ, యాకోబుచ బార పుత్తర్లు తెంతొ యూదుల్తె బార తెగల్ అస్తి. ఎత్తి పుత్తున్ తెంతొ ఏక్ తెగ.

అల్లర్ సేడ్డిసి ఓర్పుప జతిన్ చి కొడొ

9 కిక్సన్ జవున్ బావొ దాక్ జలె, బీద సుదొ జలె, దేముడు జోక గవురుమ్ రితి కెర అస్సె, జోక ఆత్మ సామ్సారుమ్ కెర అస్సెచి రిసా సర్ల జవున్. 10 దస్సి, సామ్సారి జలొ బావొ కో జలెకు ప్రబుచి తెడి దాక్ జంక జలెకి, ఏక్ వేల బీద జంక జలెకి, జో కి జోచి పెట్టి సర్ల తియన్సు. కిచ్చొక మెలె, బయిలుచి చివ్వర్చ వుల్లో కిసి పొర్న జా సుకులగె, జో మాన్సుకి ఆకర్క మొరెదె. 11 బయిలుచి చివ్వర్ జలె, పొద్దు బార్ జా గట్టిజ వాదు ఒప్పడ కెర్లె, జేవ్చ వుల్లో సుకిల్ రితి పాడ కెర్తయ్. దస్సి సుకా గెచ్చు గెస్త గెతతి. జోవయించి సూటి గెతయ్. దస్సి, జోచ కమొ కెర్లె కెర్లె సామ్సారి కి మొరెదె.

12 ప్రబుచి రిసా కో నిదానుమ్ తెన్ కిచ్చొ కిచ్చొ అల్లర్ ఓర్పుప జవుల గే, జోక చెంగిలి. కిచ్చొక మెలె, పాపుమ్తె దెర్ను నే సేడ్డె జేవ్ అల్లర్ సేడ్డి పరిచ్చుతె జిన్లె, దేముడు దెతి పరలోకుమ్తె జేవ్ గెతి కిరీటుమ్ జోక దొర్కు జయెదె. దేముడు ప్రమానుమ్ కెర్లె కోడు 'కో అంక ప్రేమ కెర్లె రితి ఇండుల గే, జోవయింకయ్ బెదవనిందె'.

13 గని అల్లర్ సేడ్డ పరిచ్చుల్ జతె పొది, కో పాపుమ్ కెరుక ఉచర్లె జవున్, పాపుమ్ కెరుక దెర్లె జవున్, "దేముడు అంక పాపుమ్ కెరయ్తయ్" మెనున్ నాయ్. కిచ్చొక మెలె, దేముడు పాపుమ్తె బెదితోసా నెంజె, పాపుమ్తె ఎర్గరె బెదె నాయ్, కో కి, కిచ్చొ కి జోక పాపుమ్ కెరవుక నెతిర్లి, చి 'పాపుమ్ కెర్ను' మెన కిచ్చొ రిసా ఉచరె నాయ్, కేన్ పాపుమ్ కెరె నాయ్. 14 మాన్సుక పాపుమ్ సికయ్తిసి కిచ్చొ మెలె, జోచి సొంత \*పెట్టిచ గార్ ఆసలి జోక సికయ్తయ్, పెలయ్తయ్. 15 మాన్సుచి పెట్టి ఆస మొదొల్ జా జెర్న, గజ్జల్ జా వడ్డ, పాపుమ్ వీరయిత్తయ్. ఒత్త తెంతొ, జా పాపుమ్ వడ్డ వడ్డ పూర్తి జా, మొర్ను వీరయిత్తయ్.

చెంగిల్ తిలిసి ఎత్తి దేముడు తెంతొ జెతిసి

16 నాయ్, బావుడ్లు, తుమ్ మోసిమ్ సేడ నాయ్. 17 చెంగిల్ తిలిన్ ఎత్తి, సత్తిమ్ తిలిన్ ఎత్తి పరలోకుమ్ తెంతో జెతయ్. ఉజిడ్ ఎత్తిక అబ్బొసి జలో దేముడు తెంతో జెతయ్. జో మార్పువ జతోసా నెంజె, జోచి ఉజిడి కెయ్య నీడ జయె నాయ్. 18 జోచి సొంత ఇస్తుమ్క, జోచి సత్తిమ్ కోడుచి సెక్తికయ్ అమ్క జో జెర్మయ్లన్. కిచ్చొక మెలె, జో జెర్మయ్లన కెర్లన ఎత్తితె అమ్ జోక దిలి † నొవొ జతి రితి అమ్క నొవర్ జెర్మయ్లన్.

19 ప్రేమ తిల బావుడ్లు, ముక్కిమ్క తుమ్ కిచ్చొ దెరన మెలె, తుమ్తె ఎత్తి మాన్సు బుద్ది కొడొ సరిగా నూన్తన జా, బమ్మ తెన్ లట్టబ్బన నే జతె, బే బేగి కోపుమ్ జా నాయ్. 20 కిచ్చొక మెలె, మాన్సుచి కోపుమ్ దేముడుచి పున్నిమ్క వాట్ దెయె నాయ్, జోచ పున్నిమ్ కమొ జర్గు కెరె నాయ్. 21 జాకయ్, మర్కటుమ్ బుద్ది ఎత్తి, తుమ్చి పెట్టి గుడియయ్ జలి కుస్సిదుమ్ ఎత్తి తుమ్చి పెట్టి తెంతో వెంట గెల కెరె, దాక కెరన, కోపుమ్ నే జతె, దేముడు తుమ్చి పెట్టి రోవిలి జోచి కోడు సేంతుమ్ తెన్ తుమ్ నూన నూన జాక పొసన. జా కోడు తుమ్చ ఆత్మల్క రచ్చించుప కెరుక తెరె.

22 గని దేముడుచి కోడు ఎక్కి నూన్తనయ్ తుమ్ జా నాయ్. ఎక్కి నూన్తనయ్ గని జోచి కోడు నే కెర్లన జలె, తుమ్ మోసిమ్ కెరన తస్సె. జోచి కోడ్ రితి ఇండ, చి తుమ్చి ఆత్మతె పలితుమ్ దెరెదె. 23 జోచి కోడు ఎక్కి నూనయ్ కో దస్సి ఇండె నాయ్ గే, కిసి జతయ్ మెలె, అద్దుమ్తె మాములుమ్ మొకొమ్ దెకన్తోసాచి రితి జతయ్. 24 జో మాన్సు అద్దుమ్తె దెకన పస్ల ఉట్ట గెచ్చ, కిసి డిసిలో గే బేగి పచ్చ గెల్తయ్. 25 గని, ఎత్తిక ‡ అదారుమ్ తిలి ఆగ్గు కో చెంగిల్ అద్దుమ్ కెరన పొసన జా ఆగ్గుచి ఉప్పిరి నిదానుమ్ జయెదె గే, జోచి రితి నూన పవేన్తోసా నే జతె, జా ఆగ్గు కెర్లొసాయి జయెదె, చి జా ఆగ్గు రితి జో ఇండితిసి పాపల్, తప్పుల్, ఇండితిన్ తెంతో జో మాన్సుక విడ్డల్ కెరెదె,

† 1:18 1:18 సంక్యా 15:19-21, ద్విత్తి 18:3-4, రోమి 11:16. ‡ 1:25 1:25 2:18 దెక.

చి జా ఆగ్ను రితి ఇండితిన్తె జోక చెంగిల్ జయెదె, ఆత్మపలితుమ్ దెరెదె.

దేముడుచి నిజుమ్చి బక్తి

26 “దేముడుచి బక్తి ఆవ్ కెర్తసి” మెన కో ఉచరంతయ్ గే, జోచి చోండి తెన్ ఇస్టుమ్ అయ్లి రితి లట్టబ్తయ్ గే, జోవయించి పెట్టి జోక జొయ్యి మోసిమ్ కెరంతయ్. జోవయించి బక్తి ఆరి జతయ్.

27 అమ్క అబ్బొ జలో దేముడుచి మొక్కె మాన్సు కెర్తి కిచ్చొ బక్తి సత్తిమ్చి నిజుమ్చి జయెదె మెలె, అమ్ జోచి సేవ కెర్తినక ‘సత్తిమ్చి నిజుమ్చి’ మెన కీస కమె రుజ్జు దెకవుల మెలె, పొర బోదల్చ, రండెల్ మాన్సుల్చ బాదల్ దెక అమ్ తోడ్ కెర్తసి, పడ్డొ ఈంజ లోకుమ్చ పాపుమ్ కమెతె అమ్ నే బెదితె ఆత్మ సుద్ది తతిసి.

## 2

సామ్సార్లుక బీద సుదల్క తేడల్ నే దెకుత్

1 బావుడ్లు, పరలోకుమ్చి ఉజిడి తిలొ అమ్చొ ప్రబు జలొ యేసుక్రీస్తుక తుమ్ నంపజలి రిసా, తిలసక నెంజిలసక తేడల్ దెక నాయ్. 2 మెలె, దొగుల నబతె అయ్లె, ఎక్కిలొ జలె, బజర్చ ముద్దివొ ఉంగారల్ తియన చెంగిల్ పాలల్ గలన అయ్లె, గని అన్నెక్కో బీద తా పోర్ను పాలల్ గలన తా జో కి అయ్లె, 3 చెంగిల పాలల్ తిలొసాక తుమ్ చెంగిల్ దెక, “ఈందె, ఇన్నె చెంగిల్తె వెసు” మెన పురె బుకార్లె, గని బీద సుదొక “ఒత్త టీచ” జవున్, “అంచి చట్టె వెసు” మెన జవున్ సంగిలె, 4 తుమ్ దొన్ని మెన్సుల్ జా తప్పుచ తిర్పుల్ కెర్తన జా తస్తె.

5 తుమ్ సూన, ప్రేమ తిల బావుడ్లు. ఈంజ లోకుమ్చి దనుమ్క దెకిలె, ఒగ్గర్జిన్ బీద సుదల్ అన్తి. జలె, \*జోవయింతె ఒగ్గర్జిన్క దేముడు నిసాన, జోచి నముకుమ్ జతు మెనయ్, జోక ప్రేమ కెర్తనక జో దెతి వాటతె బెదుత్ మెనయ్, మెలె, పరలోకుమ్తె బెదుత్ మెనయ్. 6 తూమ్, బీద సుదల్క నిస్కారుమ్ దెక అస్సున్. తుమ్క

\* 2:5 2:5 కొరింథిల్క రెగిడ్డి 2 నంబర్ ఉత్తమ్ 1:27-29.

కో నష్టల్చ మోసిమ్లు కెర్తతి గే తుమ్ ఉచర. బీద సుదల్ నాయ్, గని సొమ్మార్లుయి దస్సి కెర్తతి. జెవ్వి తుమ్క తీర్పు కెర్తి గెరితె పెలన తగుల్ కెర్తతి. 7 పడ్డొ, తుమ్ క్రీస్తుక నంప కెర్తికయ్, జోచి నావ్ తెన్ బాప్తిసుమ్ నజన్లదు, గెద. జలె, జోచి నావ్, గవురుమ్చి నావ్, కో దూసుప కెర్తతి మెలె, బీద సుదల్ నాయ్, గని సొమ్మార్లుయి.

8 దేముడుచి కొడొతె రెగిడ్డి రితి,

†“తుమ్క తూమ్ కెర్తి ప్రేమ కెరంతసు గే,  
తుచి పాసిచొ మాన్సుక కి తెద్ది ప్రేమ కెర్తె తా”

మెన పరలోకుమ్చొ రానొ జలో దేముడు దిలి ముక్కిమ్చి ఆగ్గు తుమ్ ఇండితినెతె నెరవెర్చుప కెర్తె, తుమ్క చెంగిలి. 9 గని, జా ఆగ్గు నెరవెర్చుప నే కెర్తి రితి తుమ్ తేడల్ దెకిలె, పాపుమ్ ఇండితను, చి ఆగ్గుల్చి మొక్కె పాపుమ్ సుదల్చి సిచ్చక విలువ జా అస్సున్. 10 కిచ్చొక మెలె, ఆగ్గుల్ ఎత్తి నిదానుమ్ కో కెర్తె, గని మొత్తుమ్తె ఎక్కి జవున్ పిట్టయ్లె, మొత్తుమి పిట్టయ్లొసొ జతయ్, చి మొత్తుమ్చి సిచ్చక జో మాన్సు విలువ జా అస్సె. 11 కిచ్చొక మెలె,

‡“లంజెకమొ కెర నాయ్”

మెన సంగిలొసొ,

§“నరు అత్య కెర నాయ్”

మెన సంగిలొసొ ఎక్కిలొయి. జలె, తుమ్ లంజెకమొ నే కెర్తె కి నరు అత్య కెర్తెగిన, జో దేముడు దిల ఆగ్గుల్ మొత్తుమ్చి మొక్కె పాపుమ్ కెర్తెన జా అస్సున్.

12 జలె, అమ్చ పాపుమ్చ ఆసల్, తప్పుల్ తెంతొ అమ్క విడ్డల్ కెర్తి \*మాన్సుల్క ప్రేమ కెర్తి కన్కారుమ్ దెకితి ఆగ్గుక దెకయ్ దేముడు తుమ్క తీర్పు కెరెదె. అమ్క ‘జయ్యి ఆగ్గు రితి ఇండిల గే నాయ్ గే’ మెన జో తీర్పు కెరెదె. జయి కోడు నే పచ్చితె తుమ్ లట్టబా,

† 2:8 2:8 లేపీయకాండుమ్ 19:18 మత్తయి 22:39, చి యోహాను 13:34 దెక.

‡ 2:11 2:11 నిర్లమకాండుమ్ 20:14, ద్విత్వీయోపదేశ కాండుము 5:18. § 2:11

2:11 నిర్లమకాండుమ్ 20:13, ద్విత్వీయోపదేశ కాండుము 5:17. \* 2:12 2:12 1:25,

చి 2:8 అస్సె దెక.

ఇండ. 13 కిచ్చొక మెలె, కో అన్నె మాన్సుల్క కన్కారుమ్ దెకె నాయ్ గే, దేముడు జోకయ్ తీర్పు కెర్తిన్తె జోకయ్ కన్కారుమ్ దెకుక బెదె నాయ్. గని, కో అన్నె మాన్సుల్క కన్కారుమ్ దెకితయ్ గే, జోక తీర్పు కెర్తి పొదిక జో ప్రబు జోకయ్ కన్కారుమ్ దెకెదె.

14 బావుడ్లు, “ప్రబుక నంప కెర్తసి” మెన ఎక్కిలో సంగిలె కి, జో బుల్లి బుద్ది దస్సి నముకుమ్ తెన్ నే బెదిలె, కిచ్చొయ్ లాబుమ్! ‘నముకుమ్’ మెన జో మాన్సు రితి సంగితిసి జోక రచ్చించుప కెరుక తెరె గే? తుమ్ ఉచర. 15 నంపజలొన్తె కేన్ జవున్ బావొక గే, బేనిక గే, సరిపుచుప జత పాలల్ నెంజిలె జవున్, సరిపుచుప జతి రోజుకచి అన్నిమ్ దొర్కు కెరంతి సెక్తి జవున్ నెంజిలె, 16 కో జలెకు జోక “చెంగిల్ తా. తుమ్క పాలల్ చి అన్నిమ్ దొర్కు జవున్” మెన సంగిలె, గని సరి జతి తోడు నే దిలె, కిచ్చొ లాబుమ్! కామ్క నెంజె. 17 దస్సి, రితి నముకుమ్ సంగల్లె, గని కామ్క జెతికయ్ కామ్ నే కెర్లె, జా నముకుమ్ ఆరిచి.

18 “తుకయ్ నముకుమ్, గని అంకయ్ కమొ” మెన కో జలెకు అన్నెక్లొక సంగిలె, జో అన్నెక్లొక ఆవ్ కిచ్చొ జబాబ్ దెయిందె మెలె, “తుచ కమొ నెంతె తుచి నముకుమ్ అంక రుజ్జు జయె నాయ్. కేన్ జవున్ కామ్ కెర్లెకయ్ నముకుమ్ చినుక జయెదె. ఆవ్, జలె, అంచ కమొకయ్ అంచి నముకుమ్ దెకయిందె” మెనయ్ జబాబ్ దెయిందె. 19 † “ఎక్కిలో దేముడు ఎక్కిలోయి అస్సె” మెన తుమ్ నంప కెర్తసు. జా సరిగా, గని దస్సి మెన బూతల్ కి ఒప్పున్తతి. గని ఒప్పున జేవ్ జంక బియఁ అద్దుర్ జా గెతతి.

20 చెంగిలి నే ఉచర్తొ ఓ మాన్సు, తుయి కో జలెకు, కమొతె నే రుజ్జు జతి నముకుమ్క ‘ఆరిచి’ మెన, ఆవ్ తుక రుజ్జు దెకవుక తుక కావలె గే? 21 జలె, ‡ “ ‘బలి’ మెన పుత్తుద్క కండ దె” మెన దేముడు సంగిలి రితి పుత్తున్ జలొ ఇస్సాకుక అబ్రాహామ్ బలి దెతి టాన్తె బంద తెయార్ కెర్లిన్ తెన్, జో కెర్లి జా కామ్చి రిసాయి, “నిజమి అన్నె పూర్తి నంప కెర్తయ్, సత్తిమ్ తెన్ అస్సె” మెన, దేముడు ‘జోక పున్నిమ్’

† 2:19 2:19 గలతీయుల్ 3:20, రోమీయుల్ 3:30, మార్కు 12:29. ‡ 2:21 2:21 అదికాండుమ్ 22:1-18.

మెలి రితి అబ్రాహామ్ క తీర్పు దెకె నాయ్ గే? <sup>22</sup> మెలె, జో అబ్రాహామ్ చ కమొతె జోచి నముకుమ్ బెద కామ్ కెర్తె తిలి, చి జోవయించ కమొతె జోచి నముకుమ్ బార్ జా నెరవెర్పువ జలి. <sup>23</sup> దస్సి, జా కామ్ తె జోచి నముకుమ్ రుజ్జు జలి రిసా,

§ “అబ్రాహామ్ దేముడు సంగిలి కోడు నంప కెర్లి రిసాయి ‘జోక పున్నిమ్’ మెలి రితి ప్రబు దెకిలన్”

మెన రెగిడ్లిన్ క ‘నిజుమ్’ జతయ్. \* ‘దేముడుచొ మింతున్’ మెన కి అబ్రాహామ్ చి రిసా దేముడుచి కొడెతె రెగ్గ అస్సె. <sup>24</sup> దస్సి, ఎక్కి సంగన్లి నముకుమ్ చి రిసా నాయ్, గని జా నముకుమ్ జోచి కమొతె బార్ జా రుజ్జు జలి రిసాయి, దసా మాన్సుక ‘సత్తిమ్ చొ. పున్నిమ్ చొ’ మెలి రితి దేముడు దెకితయ్.

<sup>25</sup> అగ్గె లంజె జియ తిలి రాహాబు తెన్ కి దస్సి. జేవ్ చి † ఏక్ కామ్ చి రిసా, మెలె, జా సుట్టు కబుర్ అయ్ ల పూర్గుల్ క జా మరియాద కెర, జోచ విరోదుమ్ సుదల్ తె జేవ్ దెర్ను నే సేడ్డి రితి లుంకడ, వేర వాట్ తెద్రవ దిలి రిసా, ‘జాక పున్నిమ్’ మెలి రితి దేముడు దెకిలన్.

<sup>26</sup> జలె, జీవ్ నెంజిలె ఆగ్ కీసి మొర తయెదె గే, దస్సి, మాన్సు ఇండిత కమొతె నే బార్ జలె, జో సంగితి నముకుమ్ కామ్ క నెంజె, మొర అస్సె.

### 3

#### కొడె లట్టబ్లిన్ తె జాగర్త దెకనుక

<sup>1</sup> బావుడ్లు, తుమ్ తె ఒగ్గర్ జిన్ బోదన కెర్తస జతు నాయ్. కిచ్చొక మెలె, అమ్ బోదన కెర్తస చి పూచి ఒగ్గరి, చి ఆకర్ దీసల్ క ప్రబు అమ్ క పరిచ్చ కెర తీర్పు కెర్లి పొదిక, అమ్ క జో తియార్లి జా కామ్ చి రిసా ముక్కిమ్ క అమ్ కయ్ తీర్పు కెరెదె. <sup>2</sup> అమ్ తె కో కి తప్పుల్ సంగుక జయెదె, చి కొడె లట్టబ్లిన్ తె కో కిచ్చొ తప్పుల్ నే సంగుక తెరై, జో

§ **2:23** 2:23 ఆదికాండుమ్ 15:6, రోమియల్ 4:3, 5, 9. \* **2:23** 2:23 2 దిన: 20:7. † **2:25** 2:25 యెహోసువ 2:1-24, 6:1-25.

మాన్యుక 'జోచి ఆగుచి ఉప్పిరి జో పూర్తి ఏలువ కెర్తయ్, జో మాన్యుతె కిచ్చొయ్ పొరపాట్ నాయ్' మెనుక జతయ్.

<sup>3</sup> జేవ్ కేన్ దిక్కు ఇండుక అమ్చి ఇస్టుమ్ తయెదె గే, ఒత్తయ్ ఇండుత్ మెన, గోడల్ చ చోడిలె కలెమ్ చప్లయ్లె జోచి ఒండి ఆగుక బులవుక జయెదె. <sup>4</sup> ఓడల్ తెన్ కి దస్సి. ఓడ వెల్లి జలెకి, దిక్కు దెకయ్తి జాచి చట్టు జాచి కంట ఇదిలిసి జయెదె. జలె, జా ఓడక గట్టిజ వాదు పెలిలెకి, ఓడచి కంటో దిక్కు దెకయ్తి జా చట్టు ఇదిలిసి జలెకి, ఇండయ్తోసా జా చట్టు బుడ్డవ కేన్ పక్క దెకయెదె గే, జయ్యి పక్క ఓడ గెచ్చెదె. <sup>5</sup> దస్సి, ఒండి ఆగుక జీబు ఇదిలిసి జలెకి, లట్టుబ్బె జాక కెద్ది సెక్తి! అన్నె, కెద్దె డొంగుర్ చ రూకుల్ క ఏక్ ఇదిలిసి ఆగి డయ గెలెదె! <sup>6</sup> దస్సి, జీబు ఆగిచి రితి జయెదె. అమ్చి ఒండి ఆగుతె జీబు కెద్ది పాపుమ్ కెరయెదె! అమ్చి ఒండి ఆగుక గార్ కెరెదె. అమ్ జెర్మిల్ తెంతో మొర్తె ఎదక ఈంజ లోకుమ్తెచి అమ్చి బత్తుతె జర్గు జతిసి ఎత్కిక జీబు ఏలువ కెర్తయ్. మాన్యు జాగర్త నెంజిలె, అమ్చి చోడితె వెల్లి ఆగి సేడ్డి రితి జయెదె.

<sup>7</sup> మెలె, ఎత్కి రగుమ్ జంతువుల్ క, పిట్టల్ క, అయివొ గట్టక, మొస్స గట్టక మాన్యు ముద్దొ కెరుక జయెదె. జేవ్ క మాన్యుల్ ముద్దొ కెర అస్తి, గని <sup>8</sup> జీబుక కేన్ మాన్యు ముద్దొ కెరుక నెత్తిర్తి. జీబు తుక్లె తంక నెత్త, ఒగ్గర్ ప్రమాదుమ్ దెకయ్తయ్, జాచితె మొర్తి విస్సుమ్ బెర్తు తయెదె. <sup>9</sup> జీబు తెన్ అబ్బొ జలొ దేముడు ప్రబుక గవురుమ్ సంగితసుమ్, గని మాన్యుల్ క దూసుప కెర్తసుమ్, జోచి పొలిక జేవ్ జెర్మన్ జలెకి. దస్సి, కెద్ది తప్పు కెర్తసుమ్! <sup>10</sup> ఎక్కి చోడి తెంతో గవురుమ్ సంగితిసి, దూసుప కెర్తిసి బార్ జతయ్. బావుడ్లు, ఈంజ తప్పు. ఇసిచి పొన. <sup>11</sup> ఎక్కి గొయి తెంతో ఈంట పుట్టె, చెంగిలొ పానిచి కారు జలి గర్చి పాని దెయెదె గే? నాయ్ గెద. <sup>12</sup> పడ్డె, బావుడ్లు, \* అంజూరుమ్ రూక్తె బల్లివ పండ్లు దెరుల గె? నెంజిలె, ద్రాచ చెట్లె

\* **3:12** 3:12 అంజూరుమ్ రూకు బొడ్డ రూకు రితి తయెదె.



బొడ్డ వండ్లు దెరుల గే? నాయ్, గెద. దస్సి, కారు జలి పానిచి ఊంటు చెంగిలో పాని దెయె నాయ్.

**పరలోకుమ్ తెంతో చి గ్యానుమ్ కిసి తయెదె**

13 తుమ్తె కక్కయ్ బుద్ది గ్యానుమ్? 'అంకయ్ గ్యానుమ్' మెన కో ఉచరన్లె, జా గ్యానుమ్తె బెదితి బుద్ది తెన్, గవురుమ్ నే ఉచరంతె, జా గ్యానుమ్తె బెదిత కమె ఇండ రుజ్జు దెకవుసు. 14 గని తుమ్చి పెట్టి గోసచి విస్సుమ్ తిలె, సొంత గవురుమ్ ఆనన్తి ఆన తిలె, 'ఆమ్ సత్తిమ్చ' మెన తుమ్ ఉచరన నాయ్, అబద్దుమ్ జస్తె. 15 తుమ్చి పెట్టి దస్స బుద్దుల్ తిలె, తుమ్చి గ్యానుమ్ కేనె తెంతో జెతయ్ మెలె, పరలోకుమ్ తెంతో నాయ్, గని ఈంజయ్ లోకుమ్చి తెంతోయ్, మాములుమ్ †ఆగ్ రగుమ్, బూతల్ తెంతో చి రగుమ్ జతయ్. 16 గోసలు, సొంత గవురుమ్ ఆనన్త ఆసల్ కేనె తవుల గే, ఒత్తయ్ కిచ్చొ ముద్దొ తయె నాయ్, గొడ్బల్ తయెదె, చి మాన్సుల్ ఎత్తి పావుమ్ ఇండుక అలవాట్ జవుల.

17 గని పరలోకుమ్ తెంతో అయ్లి గ్యానుమ్, ప్రబుచి సుద్ది తెన్, సేంతుమ్ బుద్ది తెన్, మెత్తన బుద్ది తెన్, సొంత ఇస్టుమ్ జర్గు కెరుక ఒగ్గర్ నే తతె, వేర మాన్సుల్చి కోడు మరియాద తెన్ నూన్తి బుద్ది తెన్ తా, కిచ్చొయ్ ఉప్రమెన్సు నెంతె తయెదె. 18 అన్నె, పున్నిమ్ కేనె పలితుమ్ దెరెదె మెలె, సేంతుమ్ కెరయ్త మాన్సుల్చి అత్తి సేంతుమ్చి బీ గలిలిన్తెయ్ పలితుమ్ దెరెదె.

## 4

**దేముడు సంగిలి రితి ఇండుక**

1 తుమ్చితె తగుల్ జతిసి, జట్టి జతిసి కేనె తెంతో జెతయ్ గే తుమ్ ఉచర. కేనె తెంతో మెలె, తుమ్చి ఆగుతె జట్టి జత ఆసల్ తెంతోయ్. 2 కిచ్చొ జలెకి ఆన జతను, చి జా దొర్కు నే జలె, అన్నెక్లొక మార్తను. దస గోసల్ తెన్ తత్తను, గని తుమ్ ఆస జలిసి దొర్కు నెంజె, చి గొడ్బల్ తగుల్ జతె తత్తను. కిచ్చొక తుమ్క దొర్కు జలిసి దొర్కు నెంజె మెలె,

† 3:15 3:15 1:14 దెక.

దేముడుక పుసున్ నాయ్. <sup>3</sup> నెంజిలె, పుసిలెకి, దొర్కు నెంజె. కిచ్చొక మెలె, గర్చి బుద్ది తెన్ పుసితసు. మెలె, తుమ్చి పెట్టిచ ఆసల్ జర్గు కెరన్కయ్ ఉచర పుసితసు. <sup>4</sup> కేన్ జవున్ తేర్బోద మున్సున్క ముల దా లంజె జలి రితి, తుమ్ దేముడుక ముల, ఈంజయ్ లోకుమ్చి బుద్దితె గెచ్చ అస్సున్! ఈంజయ్ లోకుమ్చి దనుమ్క ఆస జతిసి దేముడుక విరోదుమ్ జతయ్ మెన నేన్ను గే? జాకయ్, ఈంజయ్ లోకుమ్చి పచ్చెన కో గెతయ్ గే, దేముడుక విరోదుమ్ సుదో జతయ్.

<sup>5</sup>\* “అమ్ మాన్సుల్చి పెట్టి జో దిలి ఆత్మ జోకయ్

నిదానుమ్ తవున్ మెన జోచి ఆస”

మెన అగ్గె తెంతో దేముడుచి కొడెతె రెగ్గ అస్సె. జా కోడు ఆరి ఒత్త అస్సె మెన ఉచర్తసు గే?

<sup>6</sup> అస్సె, అమ్ వేర ఆసల్ నే జతి రితి ప్రబు అమ్క దయ కెర దొర్కు జలి తోడు తయెదె. జాకయ్, దేముడుచి కొడెతె అన్నె కిచ్చొ రెగ్గ అస్సె మెలె,

† “గవురుమ్ ఉచరంతనక దేముడు

దూరి కెర్తయ్,

గని కో దాక్ కెరనుల గే,

జోవయింకయ్ జోచి దయచి తోడు దెయెదె”

మెన రెగ్గ అస్సె. <sup>7</sup> జాకయ్, దేముడుచి తెడి జా, దాక్ కెరన జోవయించి ఇస్టుమ్ రితి ఇండుక తుమ్ కోర్ప జా. దస్సి జలదు మెలె, సయ్తాన్ పాసి అయ్లి రితి జా జోచి బుద్ది సికడుక జవున్ కిచ్చొ వేర అల్లర్ కెరుక జవున్ ఉచర్లె, జోక “ఉట్ట గో!” మెలె, జో ఉట్ట నిగెదె.

<sup>8</sup> దేముడుక పాసి జా, చి జో తుమ్కయ్ పాసి జెయెదె. తుమ్ పాపుమ్ కెర్లన తుమ్చి ఆత్మచ అత్తో సుద్ది కెరన. తుమ్ దొన్ని మెన్సుల్ తిలన, తుమ్చి పెట్టి ఎక్కి ప్రబుచయ్ జా జోచి సుద్ది జా, జోక ఎక్కి నిదానుమ్ జా. <sup>9</sup> తుమ్చ కమొచి పాపుమ్ ఉచరన పెట్టి బాద సేడ, లాజ్ జా దుకుమ్ జా ఏడ, దన కమొ ముల. పాపుమ్ కమొచి ఆసుక ముల్లి బుద్ది జా తుమ్ ఏడ. పాపుమ్ కమొచి సర్ల ముల్లి బుద్ది జా

\* **4:5** 4:5 నిర్ఘంకాండుమ్ 20:5-6. † **4:6** 4:6 సామెతల్ 3:34.

తుమ్ దుకుమ్ జా. 10 దేముడుచి మొక్కె దాక్ కెరన, చి జో తుమ్క టీవడెదె. ‡

### మాన్సుల్క తీర్పు నే కెరుక

11 బావుడ్లు, ఎక్కిలోచి రిసా అన్నెక్లో దూసుప కెర్త తీర్పు కొడొ లట్టబా నాయ్. అన్నెక్లోచి రిసా దూసుప కెర్త తీర్పు కొడొ కో లట్టబుల గే, దేముడు దిలి సీఆగ్గుక కి దూసుప కెర తీర్పు కెర్తయ్. దేముడుచి ఆగ్గుచి ఉప్పిరి తుమ్ తీర్పు కెర్తను జలె, జోచి ఆగ్గు రితి ఇండుస్ నాయ్, గని జోచి ఆగ్గుచి కంట వెల్లో కెరనుక ఉచర్లి రితి జతను. 12\* మోసే పూర్గుమ్చోచి అత్తి ఆగ్గుల్ దెతోసా తీర్పు కెర్తోసా ఎక్కిలోయి. అన్నె కోయి నాయ్. రచ్చించుప కెరుక నాసెనుమ్ కెరుక అదికారుమ్ తిలోసా. ఎక్కిలోక అన్నెక్లో తీర్పు కెరుక తూమ్ కొన్స!

### అమ్చి బత్తు దేముడుచి అత్తి అస్సె

13 అల్లె, “ఆజి గే కలిక గే పలాన్ పట్టుమ్తె గెచ్చ వెర్నెక్క రోజుక బియ్యారీ కెర కెర లాబుమ్ కెరనుమ్దె” మెన జవున్ తుమ్ దయిరిమ్ ఉచర్తస జాగర్త ఉచర. 14 కలిక కిచ్చో జర్గు జయెదె గే నేన్సు. తుమ్చి బత్తు కీసిచి? తుమ్ కీసి జస్తె మెలె, గాందుచి రితి జా, కెయ గే డీస, గడియయ్ తా, అన్నె డీసున్ నాయ్. 15 నాయ్, సొంత సెక్కిక దస్సి దయిరిమ్ నే జతె, తుమ్ కిచ్చో ఉచరుక చెంగిల్ మెలె, “ప్రబు సెలవ్ దిలె జిమ్దె, చి ఈంజ జా కామ్ కెరుమ్దె” మెన. 16 అప్పె తుమ్ కీసి జతను మెలె, తుమ్చి సొంత సెక్కిక నంపజా, దయిరిమ్ గవురుమ్ ఉచరంతను. దస్సి సొంత సెక్కిక దయిరిమ్ గవురుమ్ ఉచరంతసి

‡ 4:10 4:10 పేతురు రెగిడ్లి ఏక్ నంబర్ ఉత్తమ్ 5:5-10. § 4:11 4:11 ముక్కిమ్ జలి ఆగ్గు జలె, ఎత్తి అదికారుమ్ తిలో దేముడుక చి అన్నె మాన్సుల్క ప్రేమయ్ కెర్తసి. మత్తయి 22:37-40, మార్కు 12:30, 31, 33 చి లూకా10:27. యాకోబు 2:8 కి దెక.

\* 4:12 4:12 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రర్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాచే పుస్తకుమ్తె రెద్దయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్గుమ్చోచి అత్తి రెగిడ్లి దేముడుచ ఆగ్గుల్ మెన రర్గవ అస్సె.

తప్పు. <sup>17</sup> జలె, కిచ్చొ కెర్లె కీసి ఇండిలె చెంగిల్ గే కో జాన జానయ్ దస్సి నే కెర్లె నే ఇండిలె, జో మాన్సుక జా తప్పు పాపుమ్ జతయ్.

## 5

### మాన్సుల్క మోసిమ్ కెర్లెన్చి రిసా తీర్పు

<sup>1</sup> అల్లె, తుమ్ సొమ్మార్లు కో జలెకు, పాసి జెత తుమ్క లాయిత క్షల్చి రిసా తుమ్ ఏడుక దెర. <sup>2</sup> తుమ్చి సొమ్మార్లుమ్ కువ గెచ్చ అస్సె, తుమ్చ పాలల్క నుస్సి కా గెల అస్సె, <sup>3</sup> తుమ్చి బజార్ సామన్, వెండి సామన్క చెద్ద కా గెల అస్సె. తుమ్ కి పాడ్ జతిన్క ఈంజ సామన్ ఎత్కి కువిలిసి చెద్ద కా గెలిసి రుజ్జు జయెదె. కిచ్చొ రుజ్జు మెలె, ఈంజ నాసెనుమ్ ఆగి డడ్డిల్ రితి తుమ్చి ఆగ్గక కి కా గెలెదె. దస్సి, ఆకర్ దీనల్చి రిసా ఈంజ సిచ్చ సంపాదన కెరన అస్సన్. ఆకర్క దస్సి సిచ్చ జస్తె.

<sup>4</sup> ఆదె, తుమ్చి బుయిచి పంటొ లాయిల కూలి మాన్సుల్చి కూలి డబ్బుల్ తుమ్ మోసిమ్ కెర తియన్లదు. జా కూలి డబ్బుల్ కేక్ గల తుమ్క నింద సంగితయ్. జా పంటొ లాయిలనచి ఏడుక ఎత్కిక ఏలుప కెర్లొ పరలోకుమ్చొ ప్రబు సూన అస్సె. <sup>5</sup> ఈంజయ్ లోకుమ్తె సుక్కుమ్ తెన్ తుమ్చి పెట్టి ఇస్టుమ్ అయ్లి రితి జియ అస్సన్. 'కండుక' మెన తుమ్ బెయిలల్ గొరెల్ గట్టక కీసి బలుమ్ కెర్తసు గే, దస్సి, మొర్తి సిచ్చ కతి రిసా తుమ్క తుమి బలుమ్ కెరన అస్సన్! <sup>6</sup> పాపుమ్, సత్తిమచ మాన్సుల్క నిందల్ కెర మార అస్సన్. తుమ్క జేవ్ జబాబ్ నే దెతె తుక్లె అస్తి.

### యేసు అన్నె జెతె ఎదక నిదానుమ్ తెన్ రకుక

<sup>7</sup> జలె, బావుడ్లు, ప్రబు అన్నె జెతె ఎదక తుమ్ నిదానుమ్ తా రక. ఈందె, రయ్తు బి గల తిలె, తొలి పాని ఆకర్ పాని పెట పంటొ పికిత్ ఎదక, ఈంజ లోకుమ్చి జా విలువచి పంటొ లాయితి సమయుమ్ జెతె ఎదక బమ్మ నెంతె, జో రయ్తు రకెదె. <sup>8</sup> తుమ్ కి దస్సి నిదానుమ్

తెన్ రక. నిజమి, తుమ్చి ఆత్మతె డిట్టుమ్ జా. కిచ్చొక మెలె, ప్రబు అన్నె జెతికయ్ సమయుమ్ పాసి జా అస్సె.

9 ఎక్కిలోచి రిసా అన్నెక్లో నిందల్ ఉచర నాయ్, చి ప్రబు తుమ్కయ్ నిందల్ కెరుక తయె నాయ్. ఓదె, ఈంజ లోకుమ్చి గుమ్ముమ్ ఒత్తల్తో మెలి రితి తీర్పు కెర్టొసా జతో జో ప్రబు టీవ, మాన్సుల్క పరిచ్చ కెర తీర్పు కెరుక మెనయ్ రకితయ్.

10 బావుడ్లు, బాదల్ ఓర్పువ జతిన్చి నిదానుమ్చి రిసా తుమ్క రుజ్జు తంక మెలె, దేముడు ప్రబుచి నావ్ తెన్ జోచ కబుర్లు సూనయ్ల పూర్గుల్చి రిసా తుమ్ ఉచర. జోవయించి నిదానుమ్ దెక, తూమ్ కి దస్సి నిదానుమ్ జా. 11 ఈందె, జోవయింతె కో నిదానుమ్ తా గెల గే, 'జోవయింకయ్ చెంగిలి' మెన సంగితసుమ్. \*యోబు పూర్గుమ్చొ ఒగ్గర్ ఒగ్గర్ అల్లర్ సేడ్లె కి, జో నిదానుమ్ తా గెలిన్చి రిసా సూన అస్సెన్. జో యోబు నిదానుమ్ తతికయ్, దేముడు జర్లు కెర్లిసి, కన్కారుమ్ దెకిలిసి, రచ్చించువ కెర్లిన్చి రిసా సూన అస్సెన్, గెద. దస్సి, తూమ్ కి దేముడుచి దయ దెక అస్సెన్.

### ఒట్టు నే గలనుక

12 ముక్కిమ్క, బావొ, పరలోకుమ్చి సాచి జవున్, బుఁయిచి సాచి జవున్, కిచ్చొచి సాచి జలెకి ఒట్టు గలన నాయ్. 'నాయ్' మెనుక జలె, 'నాయ్' మెన. 'ఎఁ ఎఁ' మెనుక జలె, 'ఎఁ ఎఁ' మెన. దస్సి, ఒట్టు నే గలంతె రితి సత్తిమి సంగ.

13 తుమ్తె కో కిచ్చొ జవున్ అల్లర్ సేడ అస్సె జలె, ప్రార్దన కెర్పు. తుమ్చితె కక్క సర్ద అస్సె గే, ప్రబుచి గవరుమ్ గాయుసు.

14 తుమ్చితె కక్క జొర్టొ గే జబ్బు గే అస్సె జలె, ప్రబుక నంపజలనచి సంగుమ్చ వెల్లెల మాన్సుల్క బుకార్తు, చి జేవ్, ప్రబుచి నావ్ తెన్, జా బాద తిలోసాచి తేల్ సువ, జోచి రిసా ప్రార్దన కెర్తు. 15 ప్రబుచి ఉప్పిర్చి నముకుమ్ తిలి ప్రార్దన, జా బాద తిలోసాక రచ్చించువ

\* 5:11 5:11 యోబు పుస్తకుమ్ దెక.

కెరెదె, చి ప్రబు జోక చెంగిల్ కెరెదె. అన్నె, జో బాద సేడ్లిసి కిచ్చొ జవున్ జో కెర్లి పాపుమ్ చి రిసాచి జలె, జా పాపుమ్ కి జోక చెమించుప జయెదె. <sup>16</sup> జాకయ్, తుమ్ కెర్ల పాపల్ ఎక్కిలోచి మొక్కె అన్నెక్కో ఒప్పున, ఎక్కిలోచి రిసా అన్నెక్కో ప్రార్దన కెరె, తుమ్చ బాదల్ ప్రబు చెంగిల్ కెర్లి రితి, తుమ్క జో చెంగిల్ దెతి రితి. ప్రబుక సత్తిమ్ నిదానుమ్ తిలో మాన్సు ప్రార్దన కెర్లె, జా ప్రార్దన జలె కామ్ కెర్తయ్. <sup>17</sup> †వలీయా పూర్ణుమ్చొ జలె, అమ్చొ రితో మాములుమ్ మాన్సు, చి “పాని పెటున్ నాయ్” మెన జా సుట్టు ఎక్కి మెన్సు తెన్ ప్రార్దన కెర్లికయ్, తిన్ని వెర్పుల్ సొప్పు జొన్నొ పూర్తి జా దేసిమి పాని పెటె నాయ్. <sup>18</sup> తెదొడి అన్నె ప్రార్దన కెర్లన్, చి ఆగాసుమ్ తెంతో పాని పెట్టి, చి ఈంజ బూలోకుమ్తె పలితుమ్ అన్నె దెర్లి.

<sup>19</sup> బావుడ్లు, సత్తిమ్ ముల కో జలెకు పాపుమ్త ఉట్ట గెచ్చు తయెదె జలె, జోక కో సత్తిమ్ వాట్ అన్నె దెకవ ఆనుల గే, <sup>20</sup> జో కిచ్చొ జానున్ మెలె, జో పాపుమ్ కెర్లొసా పాపుమ్ వాటు అన్నె నే గెతి రితి జోక కో సత్తిమ్తె అన్నె కడ ఆనుల గే, మొర్నుతె జో మాన్సు నే గెతి రితి జోక రచ్చించుప కెరె తమ్దె, చి జోచ ఒగ్గర్ పాపల్ చెమించుప జతి రితి అవ్కాసుమ్ దొర్కు కెరె తయెదె.

† 5:17 5:17 రాసల్ మొదోల్ పుస్తకుమ్ 17:1, 18:41-45.

**Kupia New Testament**  
**Kupia: Kupia New Testament (New Testament)**

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

---

PDF generated using Haiola and XeLaTeX on 21 Feb 2024 from source files  
dated 29 Jan 2022

7ccb2690-4432-5e86-88c1-f8ee976f30f4